



## Adroddiad ar y Memorandwm Cydsyniad Offeryn Statudol ar gyfer Rheoliadau Gwastraff Peryglus (Diwygiadau Amrywiol) 2015.

### Cefndir

1. Ar 11 Mehefin 2015, yn unol â Rheol Sefydlog 30A.2, gosododd Carl Sargeant AC, y Gweinidog Cyfoeth Naturiol, ("y Gweinidog") Femorandwm Cydsyniad Offeryn Statudol gerbron y Cynulliad ar gyfer Rheoliadau Gwastraff Peryglus (Diwygiadau Amrywiol) 2015.

2. Mae Rheol Sefydlog 30A yn nodi bod yn rhaid i Femorandwm Cydsyniad Offeryn Statudol gael ei osod ac y gall Cynnig Cydsyniad Offeryn Statudol gael ei gyflwyno gerbron y Cynulliad os yw Offeryn Statudol y DU yn gwneud darpariaeth mewn perthynas â Chymru sy'n diwygio deddfwriaeth sylfaenol o fewn cymhwysedd deddfwriaethol y Cynulliad.

3 Ar 10 Mehefin 2015, ysgrifennodd y Gweinidog atom gan ddweud nad oedd yn bwriadu cyflwyno Cynnig Cydsyniad Offeryn Statudol, gan esbonio'r rhesymau am ei benderfyniad. Mae copi o'i lythyr yn atodedig i'r adroddiad hwn.

### Y Memorandwm Cydsyniad Offeryn Statudol

4. Mae Rheoliadau 2015 yn ymwneud â throosi deddfwriaeth newydd yr UE (Rheoliad y Comisiwn 1357/2014 a Phenderfyniad y Comisiwn 2014/955/EU) sy'n diweddarau'r rhestr o eiddo gwastraff peryglus a'r rhestr o wastraff, i newid y ffordd y caiff gwastraff peryglus ei asesu a'i ddsbarthu. Mae'r Rheoliadau yn cynnwys diwygiadau i adran 62A o *Ddeddf Diogelu'r*

*Amgylchedd 1990* (“Deddf 1990”) ar gyfer Cymru a Lloegr, sy'n ganlyniadol ar ddiweddarau'r rhestr o eiddo gwastraff peryglus a'r rhestr o wastraff.

3. Mae'r memorandwm yn nodi fel a ganlyn:

“4. Mae Rheoliad y Comisiwn yn rhwymol ac yn cael effaith uniongyrchol yn y DU. Fodd bynnag, mae angen diwygio deddfwriaeth y DU i roi effaith briodol i ddeddfwriaeth yr UE, yn rhannol oherwydd bod deddfwriaeth ddomestig yn cael ei drafftio yn y fath fodd fel na fydd yn cael ei diweddarau'n awtomatig wrth i ddeddfwriaeth berthnasol yr UE newid.”

4. Mae'r Memorandwm yn nodi hefyd:

“9. Mae'r diwygiad, sy'n un mân a thechnegol ei natur, yn angenrheidiol yn sgil newidiadau i ddeddfwriaeth yr UE... Nid yw termau Rheoliad y Comisiwn na'r diwygiad i'r Penderfyniad Rhestr Wastraffoedd yn rhoi unrhyw ddisgresiwn o ran polisi neu ddrafftio fel rhwng Cymru a Lloegr.

10. Barn Llywodraeth Cymru yw ei bod yn briodol ymdrin â'r diwygiad i adran 62A yn y Rheoliadau hyn gan mai dyna'r modd mwyaf ymarferol a hwylus i wneud y diwygiad technegol hwn ar gyfer Cymru a Lloegr.”

5. Mae'r Memorandwm hefyd yn nodi mai hwn fydd y Memorandwm Cydsyniad Offeryn Statudol cyntaf yn y Cynulliad sy'n ymwneud â Rheoliadau a osodwyd yn Senedd y DU o dan y weithdrefn negyddol. Bydd y rheoliadau'n dod i rym ar 1 Gorffennaf 2015 yn awtomatig oni bai bod gwrthwynebiad gan aelod o'r naill Dŷ neu'r llall.

## **Trafodaeth**

6. Trafodwyd y Memorandwm Cydsyniad Offeryn Statudol yn ein cyfarfod ar 22 Mehefin 2015.

## Casgliad

7. Nodwn fod y newidiadau sy'n cael eu gwneud gan yr offeryn statudol hwn yn dechnegol eu natur.
8. Mae'r offeryn statudol yn ddarostyngedig i'r weithdrefn negyddol yn Senedd y DU. Er ein bod yn cydnabod bod y weithdrefn sydd i'w dilyn yn cael ei phennu gan Ddeddf 1990, rydym serch hynny am fynegi ein hamheuron am y defnydd o'r weithdrefn negyddol i ddiwygio deddfwriaeth sylfaenol.
9. Ein safbwynt ni o hyd yw y dylai newidiadau i ddeddfwriaeth sylfaenol, ni waeth pa mor fân a thechnegol eu natur, gael eu gwneud fan lleiaf gan offerynnau statudol sy'n ddarostyngedig i'r weithdrefn gadarnhaol.
10. Fel y noda'r Memorandwm, hwn fydd y Memorandwm Cydsyniad Offeryn Statudol cyntaf i'w drafod sy'n ddarostyngedig i'r weithdrefn negyddol yn Senedd y DU.
11. Nodwn y rhesymau a roddodd y Gweinidog dros beidio â gwneud cynnig ar gyfer yr offeryn penodol hwn.
12. Ni ddylai'r penderfyniad gael ei ystyried yn un sy'n gosod cynsail dros beidio â chynnal dadleuon ar Femoranda Cydsyniad Offeryn Statudol sy'n ddarostyngedig i'r weithdrefn negyddol yn Senedd y DU. Yn ein barn ni, dylid gwneud cynnig a chynnal dadl ar faterion pwysig mewn is-ddeddfwriaeth sy'n diwygio deddfwriaeth sylfaenol.
13. Yn y dyfodol, rydym yn bwriadu monitro'r defnydd o Femoranda Cydsyniad Offeryn Statudol sy'n ddarostyngedig i'r weithdrefn negyddol yn Senedd y DU, gyda'r bwriad o sicrhau bod gweithdrefnau'r Cynulliad o dan Reol Sefydlog 30A yn dal i fod yn addas at y diben.

Carl Sargeant AC / AM

Y Gweinidog Cyfoeth Naturiol  
The Minister for Natural Resources



Llywodraeth Cymru  
Welsh Government

Eich cyf/Your ref  
Ein cyf/Our ref

David Melding AC  
Cadeirydd  
Y Pwyllgor Materion Cyfansoddiadol a  
Deddfwriaethol  
Cynulliad Cenedlaethol Cymru  
Bae Caerdydd  
Caerdydd. CF99 1NA.

10fed Mehefin 2015

Annwyl David

Rwy'n ysgrifennu atoch i'ch hysbysu fy mod wedi gosod Offeryn Memorandwm Cydsyniad Statudol (Memorandwm) mewn perthynas â Rheoliadau Gwastraff Peryglus (Diwygiadau Amrywiol) 2015 ("y Rheoliadau") a wnaed gan yr Ysgrifennydd Gwladol dros yr Amgylchedd, Bwyd a Materion Gwledig ar 5 Mehefin. Mae'r rheoliadau yn cynnwys diwygiadau i Ddeddf Diogelu'r Amgylchedd 1990 sy'n cynnwys darpariaethau ar gyfer Cymru. Hoffwn roi gwybod i chi nad wyf, er fy mod wedi gosod y Memorandwm, yn bwriadu cyflwyno Cynnig Cydsyniad Offeryn Statudol.

Mae'r Rheoliadau yn ymwneud â throsi deddfwriaeth newydd yr Undeb Ewropeaidd (UE) sy'n diweddarau'r rhestr o eiddo gwastraff peryglus a'r rhestr o wastraff, i newid y ffordd mae gwastraff peryglus yn cael ei asesu a'i ddosbarthu. Mae'r Rheoliadau yn cynnwys diwygiadau i adran 62A o Ddeddf Diogelu'r Amgylchedd 1990 ar gyfer Cymru a Lloegr, a wnaed o ganlyniad i ddiweddarau'r rhestr o eiddo gwastraff peryglus a'r rhestr o wastraff. Mae'r Memorandwm (y mae copi ohono yn amgaaedig) yn egluro'n fanylach y cefndir i'r diwygiadau sy'n dechnegol eu natur.

Rwyf wedi gosod y Memorandwm yn unol â'r gofyniad o dan Reol Sefydlog 30A i "aelod o'r llywodraeth .. [i] .. osod memorandwm (" memorandwm cydsyniad offeryn statudol ") mewn perthynas ag unrhyw offeryn statudol perthnasol wedi'u osod gerbron Senedd y Deyrnas Unedig gan Weinidogion y DU ". Rwyf yn ystyried bod y Rheoliadau yn offeryn statudol perthnasol oherwydd eu bod yn gwneud darpariaeth yn ymwneud â Chymru i ddiwygio deddfwriaeth sylfaenol o fewn cymhwysedd deddfwriaethol y Cynulliad, ac nid ydynt yn ddarpariaethau cysylltiedig neu ganlyniadol sy'n ymwneud â materion nad ydynt o fewn cymhwysedd deddfwriaethol y Cynulliad.

Mae'r Rheoliadau hyn yn ddarostyngedig i weithdrefn negyddol yn y Senedd, ac felly cawsant eu gwneud cyn iddynt gael eu gosod, a heb fod unrhyw Aelod Seneddol yn deisyfu yn erbyn, byddant yn dod i rym ar 1 Gorffennaf. Mater i chi benderfynu a ydych yn dymuno, fel y pwyllgor cyfrifol y cyfeirir ato o dan Reol Sefydlog 30A, ystyried ac adrodd ar y Memorandwm.

Rwyf wedi ystyried yn ofalus a ddylwn i fynd ymlaen i gyflwyno Cynnig Cydsyniad Offeryn Statudol o dan Reol 30A.10, i'w drafod wedi i'r 35 diwrnod a ganiateir ar gyfer craffu gan y pwyllgor cyfrifol ddod i ben. Nid oes unrhyw ofyniad ar Lywodraeth Cymru i wneud hynny, wrth gwrs, ond fel rheol byddem yn cyflwyno cynnig fel bod y Cynulliad yn gallu rhoi ei ganiatâd, neu beidio, cyn i'r offeryn

Bae Caerdydd • Cardiff Bay  
Caerdydd • Cardiff  
CF99 1NA

*Wedi'i argraffu ar bapur wedi'i ailgylchu (100%)*

English Enquiry Line 0845 010 3300  
Llinell Ymholiadau Cymraeg 0845 010 4400  
Correspondence.Carl.Sargeant@wales.gsi.gov.uk  
*Printed on 100% recycled paper*

statudol perthnasol gael ei wneud.

Yn yr achos hwn, gan fod y Rheoliadau eisoes wedi'u gwneud, yr wyf wedi penderfynu na fyddaf yn mynd ymlaen i osod cynnig, gan y byddai hynny'n arwain at y Cynulliad yn trafod ac yn penderfynu a ddylid rhoi caniatâd wedi i'r offeryn statudol perthnasol gael ei wneud. Byddai'n rhaid i bob achos gael ei ystyried yn ôl ei rinweddau, ond yn y Rheoliadau mae'r diwygiadau dan sylw yn dechnegol eu natur ac nid ydynt, yn eu hunain, yn gwneud newidiadau sylweddol i bolisi. Nid wyf yn credu bod gwerth mewn cynnal dadl yn y Cynulliad ynghylch a ddylid rhoi caniatâd i ddarpariaeth mewn Rheoliadau sydd eisoes wedi'u gwneud, a gan fod y ddarpariaeth o dan sylw yn ganlyniadol o ran natur ac ddim yn newid polisi sylweddol. Wrth gwrs, mae'n dal i fod yn agored i unrhyw Aelod o'r Cynulliad, os yw'n yn teimlo'n gryf y dylai'r Memorandwm cael ei drafod, i osod cynnig i gael dadl ar hwn yn y Cyfarfod Llawn.

Bydd y Pwyllgor, wrth gwrs, yn cael cyfle llawn i graffu ar y newidiadau yr ydym yn eu gwneud i'n deddfwriaeth i weithredu newidiadau'r UE pan fyddwn yn gosod Rheoliadau Gwastraff Peryglus (Diwygiadau Amrywiol) (Cymru) 2015 tua 20 Mehefin, 2015.

Hyderaf y bydd y wybodaeth hon yn ddefnyddiol.

Yn gywir

A handwritten signature in black ink, appearing to read 'Carl Sargeant'.

**Carl Sargeant AC / AM**  
Y Gweinidog Cyfoeth Naturiol  
Minister for Natural Resources